

Inamorarse in pandemia

A volte me sento come Cartesio e, sdraiada sul leto, penso. Forse spero che me vegni un'illuminazion come a lui che, tranquilo, mentre meditava, osservando una mosca, ga fondà la geometria analitica. Spero che me vegni una geniale intuizion anche a mi. Se Cartesio ga gavù questa illuminazion che oggi conoscemo come pian cartesian ortogonal, cossa podessi inventar mi che no xe ancora sta inventà? Cussì, sdraiada, speto la mia grande intuizion e medito. Me succedi spesso.

Questa storia dela pandemia dell'ultimo ano me ga proprio scombussolado. Dixemo la verità: un minuscolo virus ne ga cambiado radicalmente la vita. Due ani fa mi sentivo gente, che diceva: »Andemo beverse una Corona« e deso se sento qualchedun che parla de 'sto tema, me ciapa subito un mal de testa tremendo. Podemo anche ameter che semo stufi, anzi strastufi, de sentir parlar del virus. Tute 'ste vitime, 'sti malai, le complicazioni, i vacini, le cure... Che tristezza sentir solo cative notizie! Mi voio risentir de novo parlar de bira e no de malatia quando sento la parola »corona«.

Se el primo lockdown lo go soportà perché iero convinta che, da ottimista, saria finido ben, el secondo me sembrava che dura ani. Me anoiavo a morte: tuto iera chiuso, divieti infiniti, sanzioni, le notizie continuava a esser brute. La scuola online xe triste, 'sto zoom non xe proprio el massimo. Son una persona socievole e me piaxi el contato direto con le persone, perfino con i professori. I amici xe l'unica roba che te fa tegnir lucido e che non te fa portar in un ospedal psichiatrico, ma fora no te vadi perché a casa te ga i genitori e i nonni che, se sucedi che te li infetti e i va finir in ospedal, te se senti in colpa. Allora, cosa far? Un poco studiar, meditar, pasar el tempo con el telefono in man. Magari se conossi nova gente, se spera qualchedun de interessante del tuo stato, dela tua region, o ancora meio, del tuo comun? Xe possibile gaver questa fortuna? Mi son nata ottimista.

Desso ve conto una storia, la mia storia. Un giorno mi e la mia amica, tute due single, ierimo in camera mia. Meditaimo, parlaimo, chataimo. Ela se scriveva con un mulo. Precisemo per ben: in amicizia. La mia amica ghe ga mandà una foto de mi per farne un scherzo. Lui el ga subito domandà chi son e sempre per scherzo se scambiamo i contati social. Se sa che noi semo la generazion Z e la tecnologia la gavemo nel sangue. Quela note mi e 'sto mulo, che ciamaremo Aleks, se gavemo scritto tuta la note. Un poco per noia e un poco per curiosità.

Scopro presto che el xe del mio steso comun, de un paesin a cinque minuti de mi. Mai visto prima o almeno no me lo ricordavo. In pien periodo pandemioco mi conosso una persona simpatica e cocola che podarò veder dal vivo e no online! Incredibile! Primo appuntamento a

Formaviva, tra le sculture, al freddo e quasi buio, in inverno, come due ladri, per no farse beccar. Ma in fondo no fazeimo niente de mal, solo una passeggiata dal vivo, nel mondo reale, su una panchina a parlar. Me pareva de veder un film dei ani '90.

Finalmente gavevo trovà una persona che parla quanto mi, tuti e due estroversi, un poco testardi. E sembrava che no podeimo smeter de contarsela, come due babete de piazza.

Mia mama ancora deso la me ciol in giro, la me dixi: »Vara ti, 'sta mia fia, che, za trovar l'amor giusto xe difficile, ma ela la riva innamorarse in piena pandemia!«

Cussì, parlando, scambiandose opinioni, se conoscemo meio.

All'inizio pensavo a una distrazion momentanea, dovevo comunque pensar prima ala scuola.

Ma lui ga i oci da cerbiato e un sorriso contagioso e sincero, ironico al punto giusto e soprattutto intelligente. Insieme se scherza, se parla, se ridi. In serenità. Me sembra che xe quel de cui noi giovani, ma anche tuti i altri gavemo bisogno: la serenità.

Ogi me trovo, come Cartesio, sul leto a pensar ala mia fortuna e calcolar che possibilità gavevo de incontrar una persona speciale in un periodo buio come questo. Secondo i mii calcoli minime. Volevo contar la mia storia felice per dar un poca de speranza a chi la ga persa.

E questa xe la mia storia, la storia de due adolescenti anoiadi, che ala fine i se ga innamorado. Insieme speremo in un futuro migliore per tuti, dove il Covid-19 sarà solo un ricordo. Ai mii posteri podarò contar che in pandemia, tra mascherine, igienizzanti, storie tristi de malattia e morti a causa del Covid-19, mi me son innamorada. Contarò che iera una bela storia d'amor, nata per sbaglio, durante uno tra i periodi più bruti che gavemo passà.

Innamorarse e esser contaccambiadi xe sempre bellissimo, anche in pandemia.